

Dogen's *Jodo*
(Zen Sermons) 471-531
Chinese Text

Digitization by Hyatt Carter

Dogen's 10-volume book, *Eihei Koroku*, is a close rival in importance to his masterwork, *Shobogenzo*. The first seven volumes of *Eihei Koroku* contain 531 of Dogen's Zen sermons, or *jodo*, that were recorded by Dogen's personal assistants. *Jodo* (上堂) is shorthand for "the abbot enters the assembly hall and ascends to the high seat." And, from that high seat, he delivered the Zen sermons to the monks assembled around him.

Here is the complete Chinese text of the 61 *jodo*, sermons 471 through 531, in Volume 7 of Dogen's *Eihei Koroku* (永平廣錄). I have paragraphed the sermons to correspond to the paragraphing in the English translation of Dogen's book by Dan Leighton and Shohaku Okumura.¹ Poems, in quatrain form, are indented, as in 473 and 474.

471

上堂

云。有問有答、屎尿狼藉。無問無答、雷霆霹靂。十方大地平沈、一切虛空迸裂。外不放入、內不放出、一槌痛下萬事了畢。且恁麼時、又作麼生。

良久云、再三總在畫圖中、猛劈從教深夜雪。

472

上堂

舉。三祖大師云、至道無難、唯嫌揀擇。見聞這箇不知者則云、諸法無善惡、一切無邪正、但任性逍遙、隨緣放曠也。所以一切善惡邪正、不揀擇而趣向也。

或云、所謂不揀擇者、不用言語而道也。但打圓相、豎起拂子、卓一拄杖、擲拄杖、掌一掌、喝一喝、拈來蒲團、拈來拳頭而對便得也。

恁麼見解、未出凡夫之窟。若人問永平、作麼生是唯嫌揀擇底道理。

祇向他道、金翅鳥王非生龍不食、補處菩薩非兜率不生。

473

上堂

云。嵩嶽高祖云、我滅後八千年、我法如髮許不移、如我在世也。

我佛如來道、為蔭滅後遺法弟子故、留在白毫一相功德。又云、為利益遺法弟子故、留與二十年佛壽蔭覆弟子。

今日永平偶有一頌。

良久云、

臘月寒梅含月光。
雪山雪上更加霜。
如來毫相猶今在。
利益遠孫豈度量。

474

上堂

時節因緣佛性、
剎那前後圓成。
積功累德雖異、
乳酪有無得名。

475

臘八上堂

世尊成道最初說、是夜四分、乃至一切智、師如前舉了著語云、

無量功德今已現。[跣 - 石 + 孛]跳手中臘月扇。

往昔造作、乃至皆除滅、師如前舉了乃云、 Blue Font—See Endnote 02

永平拜續成道之成。修証不無覺道成。有何階級曉天明。是時我等大慈父。可悅眉毛添一莖。

476

上堂

修証現成、無以窮其時劫。因果圓滿、無以限其始終。以法為界、則無中邊。以智為身、則無向背。且道、恁麼行履時又作麼生。

良久云、三千世界戴恩臨、一切衆生從化導。

477

上堂

記得。趙州道、木佛不度火、金佛不度鑪、泥佛不度水、真佛內裏坐。

大眾委悉麼。

如何是木佛、拘留孫佛是也。

如何是金佛、拘那含牟尼佛是也。

如何是泥佛、迦葉佛是也。

如何是真佛、釋迦牟尼佛是也。

為甚恁麼道。

良久云、如來妙色身、世間無與等。

478

先妣忌辰上堂

乞兒打破鉢盂時、桃李縱經霜與雪、吾佛毫光照十方。光光微妙法演說。這箇是佛祖處分底、更向衲僧行履處又且如何。

擲下拄杖顧視大眾、以右手指指云、看看、衲僧拄杖打巾斗、觸處一時業識裂。

479

上堂

云。三世諸佛、諸代祖師、為一切人天大眾施設有一法。

謂、生死長、生死短。若依貪瞋癡、即生死長。若依戒定慧、即生死短。

爾時佛前有德女、而白佛言、世尊、貪瞋癡依何有。

佛告德女、依無明有。

德女言、若貪瞋癡依無明有者、諸法皆有也。

佛告德女、汝言無明、內有也不。

女言、不也。

佛言、外有也不。

女言、不也。

佛言、非內外有也不。

女言、不也。

佛言、如是有。

如來世尊既恁麼道、永平雲孫不可不道。今日有德女問永平、無明在何處。祇向伊道、直饒認得無明依處、未免永平拂子。

480

上堂

一切衆生、輪迴生死之際、受南洲之身最難最稀。

如來一日、撮土置於指甲上示衆會言、三千大千世界土多、我指甲上土多。

於時阿難白佛、三千大千世界土多、不可此如來指甲上土。

世尊告言、受南洲人身者、如指甲上土。不受南洲人身、如三千大千世界土。生值佛法亦稀於此。

大眾既受難受之人身、值難值之佛法。須救頭燃而辦道。

記得。馬鳴尊者問富那夜奢尊者、我欲識佛、何者即是。

奢曰、汝欲識佛、不識者是。

鳴曰、既不識佛、焉知是乎。

奢曰、既不識佛、焉知不是。

鳴曰。此是鋸義。

奢曰。彼是木義。奢問曰、鋸義者何。

鳴曰、與師平出。鳴曰、木義者何。

奢曰、汝被我解。

鳴、豁然省悟。

忽有人問永平、鋸義者何。向他道、天地懸隔。

木義者何。向他道、毫釐有差。

481

上元上堂

雪覆蘆華豈染塵、
誰知淨地尚多人、
寒梅一點芳心綻、
喚起劫壺空處春。

482

上堂

佛法二度入震旦。一者跋陀婆羅菩薩傳來、在瓦官寺傳秦朝之肇法師。一者嵩山高祖菩提達磨尊者、在少林寺傳齊國之慧可。肇法師之傳今既斷絕、可大師之稟授弘於九州。我儻酬宿殖般若之種子、得值殊勝最上之單傳而修習。當救頭燃而精進。

佛言、有二人罪人。謂、一人殺三千大千世界之衆生、一人得大智慧罵謗坐禪之人。二人之罪、何者是重。佛言、毀謗坐禪之人、猶勝於殺三千大千世界衆生者。

測知、坐禪其功德最勝甚深。乃云、在單多劫參禪客、還見一條拄杖烏。正當恁麼時、更有脫落底道理也無。

良久云、將謂胡鬚赤、更有赤鬚胡。

483

上堂

若論此事、十方諸佛、修証不無、一切祖師、污染不得。是以靈山百萬億衆、獨教迦葉住持、黃梅七百高僧、唯選行者傳法。

豈是庸流之所能也。非庸流者誰。謂、真出家者。夫真出家者、直須秉丈夫決烈之籌、建精進勇猛之幢。遂則拈得佛祖鑰匙子、打開向上一重關、運出自己家財、賑濟一切孤露。正恁麼時、方最初報佛恩德。以拂子擊禪牀下座。

484

上堂

云。肇公云、菩提之道不可圖度。高而無上、廣不可極。淵而無下、深不可測。

今日永平、事不可得已、為雲衆水衆一一注脚。

菩提之道。師云、騎牛修道。

不可圖度、師云、歸家卜度。

高而無上、師云、黃鶯啼柳上。

廣不可極、師云、色到極微極。

淵而無下、師云、金剛輪在風輪上。

深不可測、師云、洪焰互天玉不測。

485

上堂

云。夫佛祖之兒孫、必定單傳佛祖之大道也。我佛如來言、假令經百劫、所作業不亡、因緣會遇時、果報還自受。

第十九祖鳩摩羅多尊者、示闍夜多尊者曰、且善惡之報有三時焉。凡人但見仁天暴壽、逆吉義凶、便謂亡因果、虛罪愆。不知影響相隨毫釐靡忒、從經百千劫亦不磨滅。

佛祖之道如斯。佛祖之兒孫、直須刻骨銘肌而已。

外道六師之中第一富蘭那迦葉、為諸弟子說如是言、無有黑業、無黑業報。無有白業、無白業報。無黑白業、無黑白業報。無有上業及以下業。

第六尼乾陀若提子、為諸弟子說如是言、無惡無善、無父無母、無今世無後世、無阿羅漢無修道。一切衆生、經八萬劫、於生死輪自然得脫。有罪無罪、悉亦如是。

明知、佛祖所說與外道邪見、終不可同。謂、業報有三種、一現在受業、二生受業、三後受業。此三種業、如影響相隨、似以鏡鑄像。

涅槃會上堂

云。二千年前今日、我等本師釋迦牟尼如來、般涅槃于娑婆世界西天竺菩提樹。每遇今日、枝低葉萎、憂如來之涅槃也。此涅槃道理、莫向初祖破顏之處而相看。莫向二祖禮拜之時而認得。豈向衲僧打圓相以卜度。豈向作家擊禪牀以商量。

六祖曹谿大鑑禪師、示志道禪師云、無上大涅槃、圓明常寂照。凡夫謂之死、外道執為斷。諸求二乘人、自以為無作。盡屬情所計、六十二見本。

然則非出入隱沒、非生滅去來。然而機緣感會現般涅槃而已。今夜涅槃雙樹、又言常在靈山。何時得見慈父。孤露空留世間。雖然如是、大千娑界雲孫、正當恁麼時作麼生道。

良久云、

鶴林月落曉何曉、
鳩尸華枯春不春、
戀慕何為顛誑子、
欲遮紅淚結良因。

上堂

發心畢竟二何窮。
如是二心佛祖風。
忘自度他功德力。
家鄉春色桃華紅。

上堂

記得。趙州、因僧問、如何是祖師西來意。

州云、庭前柏樹子。

僧曰、和尚莫以境示人。

州云、吾不以境示人。

僧曰、如何是祖師西來意。

州云、庭前柏樹子。

近代學人、不會趙州意、不學趙州言、深可憐憫者也。或云、趙州為不令學人之一點見解、所以前來也道庭前柏樹子、後頭也道庭前柏樹子。或云、一切言語悉是說禪、所以前後同以道柏樹子也。如是等之輩、如稻麻竹葦。然而於趙州道處、將著春夢也未得在。

今有人問永平、如何是祖師西來意。向他道、蒼波迢迢涉三周。

他若道、和尚莫以境示人。須向他道、吾不以境示人。他又問、如何是和尚不以境示人底道。

祇向他道、

靈山瞬目豈時節、
微笑破顏尚未休、
四五千條華柳巷、
二三萬座管絃樓。

489
閉爐上堂

一枚圓相向春到。
開閉臨時似畫圖。
添炭見灰兼點雪。
衲僧喚作是紅爐。

490
上堂

云。記得。南嶽懷讓禪師初參曹谿之時、六祖問、汝什麼處來。

讓云、嵩山安國師處來。

祖云、是什麼物恁麼來。

讓罔措。終至八年、讓告祖云、懷讓會得某甲初來時、和尚接某甲是什麼物恁麼來。

祖云、汝作麼生會。

讓云、說似一物即不中。

祖云、還假修証也無。

讓云、修証不無、污染即不得。

祖云、只是不污染、即諸佛之所護念。汝亦如是、吾亦如是、乃至西天諸祖亦如是。

師云、還要委悉這箇道理麼。六祖若問、什麼處來。代南嶽云、久響和尚道德之風、此來禮拜、下情不勝感激之至。

六祖又問、是什麼物恁麼來。代南嶽、向六祖曲身問訊叉手道、即辰季春極暄、伏惟和尚尊候、起居萬福。

他若問、南嶽道說似一物即不中意旨如何。祇向他道、任他茅草青猶嫩、春日遲遲欲結庵。

他又問、六祖道此是不污染、即諸佛之所護念、汝亦如是、吾亦如是、乃至西天諸祖亦如是等意旨如何。欲向他道、優鉢羅華向日開。

491

上堂

流轉生死之中、遇如來之出世、最第一之果報也。雖不遇如來在世、得遇正法、其次也。雖不遇正法、得遇像法、又其次也。雖不值正法・像法、猶生值佛法未滅之末法、是則世之優曇華、人之芬陀利華。不此輪王、不比北洲。既得遇逢、最可真實修行辦道之時。先達之所覓、唯是正見也。欲得不錯見也。

今以如來之正法眼藏涅槃妙心無上菩提、猥號禪宗、是錯也、豈無見毒乎。

西天廿八代、嫡嫡相承。廿八祖菩提達磨尊者、不辭萬里、航海三年、遂到振旦屆南海廣州。于時梁武帝普通八年也。相見梁武、梁武不重祖。遂出國入魏之嵩山。

寓少室峰少林寺、面壁九年。得神光傳法傳衣。五傳而至曹谿、有兩神足。謂、青原弘濟大師南嶽大慧禪師也。青原唯有一子、謂石頭也。南嶽唯有一子、謂江西也。後代須知、上古猶得人不多、當時豈無如近代之邪魔魍魎乎。江西得百丈、石頭得藥山。如江西・石頭・藥山・百丈之祖師、今日不可有也。如此祖師在世之時、未聞以佛法稱禪宗也。二三百年已來、猥稱禪宗。未明出處之根源、頗妄稱也。

石門林間錄曰、菩提達磨、初自梁之魏。經行於嵩山之下、倚仗於少林、面壁燕坐而已、非習禪也。久之世人莫測其故。以達磨為習禪。夫禪那諸行之一耳、何足以儘聖人。而當時之人、以之為史者、又從而佛習禪之列、使與枯木死灰之徒為伍。雖然聖人非止於禪那、而不違禪那。

然則往代亦有明道之師、如今無聞道之人。可哀可哀、邪魔魍魎•野獸畜生、猥號禪宗、而謬論雌雄於法華•華嚴等之宗、所以澆季無人也。佛祖單傳、唯是我釋迦牟尼佛之正法也、阿耨多羅三藐三菩提也。所以須知、佛法之中有法華•華嚴等、非法華•華嚴等各各之中有各各之佛法也。然則法華•華嚴等八萬四千法藏、悉是佛祖單傳也。非法華•華嚴等外別有祖師道也。所以不可與諳宗比肩也、唯如國之得王也。

為無上菩提求道之輩、不可以佛祖單傳直指無上正法而稱禪宗者歟。若稱禪宗、非佛祖之兒孫、又可有見毒也。

良久云、佛法本非名相表、後人謬立許多名、少林面壁蹤相似、莫號禪宗惑有情。

492

上堂

云。學佛法人、是名作白業人。若求世路官途•名聞利養、乃作黑業人。黑業故墮三惡道、白業故得諸佛道。所以先代善知識•出家兒、不務官途世路、豈著名聞利養乎。夫出家人、不業詩書•和歌等、救頭燃而學道。況乎人命無常、如草露水沫。雖如草露水沫之脆、若荷擔佛祖之道、乃生死海中之慶幸也。

記得、藥山久不陞堂。院主白云、大衆久思和尚慈誨。

藥山云、擊鐘著。擊鐘、衆集。藥山方陞座。良久便下座、歸方丈。

院主墮後白云、和尚適來許為衆說法。為什麼不垂一言。

藥山云、經有經師、論有論師、爭怪得老僧。

師云、要知經有經師、論有論師、爭怪得老僧麼。

汝爭怪得、老僧是師、汝是弟子也。

要知和尚適來許為衆說法、如何不垂一言麼。

雷聲遠震、所以道不垂一言也。

493

上堂

舉。臨濟喫黃檗拄杖六十後、參大愚處。知黃檗意還黃檗。檗云、這風顛漢、參堂去。

大眾要會這一段因緣麼。

良久云、

棒頭眼若百千日。
照破從來夢使覺。
非罰非賞痛處親。
老婆心切可何少。

494

上堂

記得。洞山悟本大師、供養雲巖真次、遂舉邈真話。有僧問、雲巖道只這是意旨如何。

洞山云、我當時洎錯會先師意。

僧云、未審、雲巖還知有也無。

洞山云、若不知有、爭解恁麼道。若知有、爭肯恁麼道。

師、良久云、爭解恁麼道、明星出現大千曉。

爭肯恁麼道、雞足山開迦葉老。古鏡圓明照正偏。玄機高轉自兼到。門風歷劫綿綿。父子聲光浩浩。

495

浴佛上堂

八相成道者諸佛化儀也。是以摩耶詣到毗尼園、菩薩降生現世間。帝釋承衣擎菩薩、人天始拜獨尊顏。正當恁麼時、寶蓮華開以承菩薩足、諸天華雨以散菩薩上。即行四方面各七步、觀視四方目未曾瞬。口自出言、世間之中我為最勝。世間之中我為最尊。我從今日生分已盡、是最後身、我當作佛。

地涌二池而供養聖母、空下二水而滲菩薩。瓔珞寶衣充滿、金牀寶傘圓備。蓋是諸天之所供養也、宛是機錄之所純熟也。天女二萬、圍遶於摩耶而扶持。諸天五百、讚歎於菩薩而祇候。三千大千之草木、忽生好華。一切所有之衆生、悉被光明。受苦之類皆脫苦、快樂之輩更增樂。吉祥之瑞相、誰敢說盡。慶幸之利益、今日猶新。為甚如斯。大眾還要委悉這箇道理麼。

良久云、坐斷衲僧乾屎橛、功夫弁道草鞋穿。無明殼豈等眉、從此剎那王大千。

496

上堂

云。兄弟、好箇時光、直須努力。時不待人、須救頭燃覲面相附、豈假言宣。對眼投機、喚作參玄上士。若能如是、所以宗風不墜。正當恁麼時、又且如何。

良久云、四蛇畫足非我意、一世勤修佛祖心。

497

上堂

初祖西來震旦温至。前後雖妙嵩嶽獨親。迢迢航海三周、兀兀面壁九歲、兒孫遍滿天下、嫡嗣適臨吾朝。可謂、國初感得戒定慧之本主、如民得王。人方決定身口意之善根、如闇得燈。誠是優曇華開一切愛敬、獅子哮吼妖怪俱休。

是以青原定價於廬陵來、南嶽說似於即不中。日面月面、眼睛豁開。明頭暗頭、鼻孔高直。黃梅•黃檗、拗折拄杖、雲巖•雲居、拈來蒲團。既得恁麼、不可空過、直須熾然救頭燃、猛利勤勇猛。正當恁麼時、作麼生行履。還要委悉麼。

良久云、

磨磚作鏡誰人笑、
翠竹黃華入畫圖。
莫管商量浩浩地、
種田必是作功夫。

498

上堂

行解俱備方曰祖師。謂其行者、謂祖宗之密行也。謂其解者、謂祖宗之解會也。佛祖之行解、解可解、行可行而已。其行之初者、割愛無所親、棄恩入無為也。不經歷聚落、不親近國王、入山求道也。古來慕道之士、皆入深山閑居寂靜。

龍樹祖師云、坐禪人皆住深山。須知、脫憤鬧得寂靜、不如深山。縱愚須居深山也、愚而居聚落增其朱。縱賢須居深山也、賢而居聚落損其德。

永平壯齡訪道於西海之西、潦倒占居於北山之北。雖不肖慕古蹤也。不論賢・不肖、不擇利・鈍機、須居深山幽谷也。

大慈示衆云、說得一丈、不如行得一尺、說得尺、不如行得一寸。

洞山云、說取行不得底、行取說不得底。

雲居云、行時無說路、說時無行路、不行・不說、合行什麼路。

洛浦云、行說俱不到則本事在、行說俱到則本事無。

宏智云、絕是非沒蹤跡。相逢不識面、識面不相識。諳尊宿各有長處。如今舌頭上無十字關、腳跟下無五色線。要行便行、要說便說。若有人問長蘆、如何是要行便行。宏智云、步。如何是要說便說。宏智云、啊。

師云、五位尊宿各恁麼道。永平今日為甚不道。橫說豎說、一如妙行密行。妙行密行、一如橫說豎說。

499

上堂

向日開來手裏華、與時煎點趙州茶。衲僧圓相中秋月、更問如何三斤麻。正當恁麼時、又作麼生道得。

良久云、傳衣處有何意、莫打牛須打車。

500

上堂

若論禪說道、談玄演妙、舉揚宗風、只如當人分上。於一毛端裏、有無量諸佛諸祖、發]菩提心、勤修大行、成等正覺、轉大法輪、廣作佛事。汝等還知、還見也無。又於一塵中、現寶王刹、建立法幢。佛說、法說、比丘僧說、刹說、塵說、衆生說、山河大地說、古今一時說、未嘗間斷也。既能恁麼。不應忽諸輕慢佛祖單傳學道之現前也。正當恁麼時、便於佛祖或凡或聖、久學晚進分上、作麼生道。

良久云、但覺華開世界馥、誰知鼻孔一時穿。擲下拂子下座。

501
上堂

身心脫落功夫初、露柱懷胎豈弁無。彌布密雲山嶽靜、上高圓月越方隅。獨立卓卓而不倚一切。佛身魏魏而不墮諸數。所以古德道、聖人空洞其懷。萬物無非我造。會萬物為己者、其唯聖人乎。正恁麼時作麼生、還要委悉麼。

良久云、月逐舟行江海廣。春隨陽轉葵華紅。

502
上堂

先師天童上堂、示衆云、記得。僧問古德、深山巖崖中還有佛法也無。

古德云、有。

僧云、如何是深山巖崖中佛法。

古德云、石頭大底大、小底小。

先師天童云、深山巖崖問、石頭大小答、崖崩石迸裂、虛空鬧聒聒。

師云、還要委悉這箇道理麼。深山仏法巖崖問、大小石頭千萬答、有邊無邊成劫壞劫。正當恁麼時、永平門下又且如何。

良久云、深山不必嶽巖崖、衝破上關鬧聒聒。

503
上堂

記得。僧問雲門、如何是佛。

雲門云、乾屎橛。

先師頌曰、

雲門倒屣一橛屎。
惱亂瞿曇痛處針。
要見海枯終徹底。
始知人死不留心。

今日永平欲續其韻。

萬行豈是等閑性、
佛病耆婆獻一針。
縱見海枯無徹底、
誰明人死不留心。

504

佛樹先師忌辰陞堂

舉。古佛云、身從無相中受生、猶如幻出諸形像。幻人身識本來無、罪福皆空無所住。

師云、受生且致、作麼生是無相底道理。還要聽麼。是法住法位、世間相常住。這箇是唯佛與佛乃能究盡底道理、今日知恩報恩底一句又作麼生。

良久云、如來未越明因杲、菩薩必生兜率天。

505

上堂

自今朝六月初一、放下坐禪板不鳴。盛夏未拋禪板舊。須知傳法救迷情。

506

臘八上堂

今夜如來成正覺。功夫脫落眼睛明。三千世界衆生類。一等與他微笑生。雖然恁麼、永平門下衲僧分上又作麼生。

良久云、雪裏梅華春色妙、一條拄杖黑光清。

507

準書狀、爲懷鑑上人忌辰請上堂

云。

老鶴巢雲眠未覺。
壺冰雪上更加霜。
莊嚴報地豈他事。
有少薰修一炷香。

且道、衲僧分上、今日又作麼生。

良久云、休言彼岸目前外、拄杖一條是橋梁。

508
上堂

云。

圓相一輪滿、
傳衣古有聲、
瑞華千萬葉、
結杲藉因成。

509
上堂

云。夫學佛道、見解須正。見解若邪、光陰虛度。近代皆云、諸人應諾之處、即諸人本命。冷暖自知之處、即諸人主人公。向來乃是佛性、更不可有第二人也。若恁麼會、則先德之所呵也。

不見、竺尚書問長涉岑和尚、蚯蚓斬為兩段、兩頭俱動、未審、佛性在阿那箇頭。

沙云、莫妄想。

書云、爭奈動何。

沙云、只為風火未散。

書無對。

沙喚尚書。

書應諾。

沙云、不是尚書本命。

書云、不可離却即今祇對有第二箇主人公也。

沙云、不可喚尚書作今上也。

書曰、與麼則總不祇對和尚、莫是弟子主人公否。

沙云、非但祇對•不祇對老僧、從無始劫來、是箇生死根本。

乃示頌云、

學道之人不識真、
祇為從來認識神、
無始劫來生死本、
癡人喚作本來人。

此頌乃後學晚進之明鑑也。照古照今、照邪照正。若拈得這箇明鑑、乃離喚尚書作今上之錯、又離妄想佛性之錯也。

夜來長沙來宿于永平拂子頭上眠、寐語作聲再三誦斯頌。仍永平聊續其韻。

良久云、

學道直須體達真、
祖師未弄識將神、
尚書設使稱今上、
千萬年中莫一人。

510
上堂

云。學道之人、莫得撥無因果。因果若撥、修証終乖。

舉百丈野狐話了、乃云、或者疑云、野狐是畜生、那得知五百來生。此疑最愚。汝等須知、衆生之類、或畜或人、具生得之宿通有之。

或云、不落•不昧乃一等、然而墮•脫只是自然而已。如是見解、乃外道也。今日永平著一句語。若道不落因果、必是撥無因果、若道不昧因果、未免數他隣珍。

良久云、多歲住山烏拄杖、作龍一旦起風雷。

511
上堂

記得。唐朝大義法師、問鵝湖和尚、欲界無禪、何修禪定耶。

鵝湖云、汝只知欲界無禪、未知禪界無欲。

大義無對。

良久云、七顛八倒拈來用。無欲•無禪兩不真。兀兀功夫無覓處、那能三界作肩隣。

千光禪師前權僧正法印大和尚位忌辰上堂

頂門開眼活、覷破佛祖之淵源。肘後帶符靈、觸折生死之關鍵。全機用得舉照無遺。撒手懸崖脫身空劫。向上透頂透顛、直下透根透塵。眼不以視為功、耳不以聽為德。六根迴換、萬境虛閑。入佛入魔、所以斷絕同異之相。全生全死、所以脫落去來之機。既然如斯、且道、師翁千光和尚即今在何處。

良久云、謾把鴛鴦閑綉出、從教人競覓金針。

上堂

云。夫學習佛法、最為難得。所以者何。縱雖發心之有實、不知落魔、不覺發病、道心破敗、修証退墮。真可憐憫者也。近代學者、被嬌聰明魔以為悟道、值發名利病以為効驗。非但損壞一生一身、亦能損壞多生曠劫功德善根。是乃學人最可悲也。所謂悟者、太不容易領覽也。非思量分別之所能解、非聰明利智之所曉了也。認魔嬌而為大悟、執病患而為功德、豈不錯乎。

兄弟直須審細參學治魔療病。所謂魔者、現父母•師長•兄弟•骨肉•親昵•從僕之類、頻頻強說退道因緣。亦現諸佛•菩薩•諸天•羅漢等身、又能教諭學者言、佛道長遠久受勤苦、不如自調。長養身命、安穩快樂、恆在世間、衣食豐饒、五欲自恣、得道自然。大道何關彼此、造次顛沛歸性也。或說難可棄捨之因緣、而教退轉於道也。學者知而不可須也。

記得。僧問京兆華嚴休靜禪師、大悟底人却迷時如何。

休靜曰、破鏡不重照、落華難上枝。

師云、永平今日雖入華嚴之境界、未窮華嚴之邊際。事不獲已、鼓兩片皮。或有人問永平、大悟底人却迷時如何。只向伊道、大海若知足、百川應倒流。

解夏上堂

以弄精魂之智為身也、說他未了說自。以非思量之法為界也、有邊還是無邊。論其應用兮清風遍。論其修証兮老鶴眠。既恁麼、琉璃殿上忽秋色、明月堂前幾曉天。正恁麼時如何、還會麼。

良久云、園驢八百馬三千、補處雖生第四天、偏正不曾離本位、無生那得語因緣。

515

天童忌上堂

云。先師今日忽行脚、趯倒從來生死關。雲慘風悲溪水潑、稚兒戀慕覓尊顏。這箇是遷化圓寂底句。永平門下知恩報恩底句又作麼生道。

良久云、戀恩年月雲何綻、淚染衲衣紅不斑。

516

上堂

龍樹祖師曰、坐禪則諸佛之法也。而外道亦有坐禪。雖然外道、有著味之過、有邪見之刺。所以不同諸佛・菩薩之坐禪也。二乘・聲聞亦有坐禪。雖然二乘、有自調之心、有求涅槃之趣。所以不同諸佛・菩薩之坐禪也。

師云、龍樹祖師既恁麼道。須知、二乘・外道雖有坐禪之名、不同佛祖相傳之坐也。近代宋朝諸山杜撰長老等、未知此等之道理。蓋是佛法之衰微也。兄弟須知、祖師唯傳佛法之正脈面壁坐禪。後漢永平以來、雖有依文解義之坐全無其儀、唯獨祖師傳而已。誠是佛法之親傳者歟。面壁坐禪佛祖傳。不同外道・二乘禪。機先開得機先眼。譬如臘月火中蓮。

517

上堂

記得。西天第二十祖闍夜多大士、問鳩摩羅多尊者、我家父母、素信三寶。而嘗縈疾瘵、凡所營作皆不如意。而我隣家、久為旃陀羅行、而身常勇健所作和合。彼何幸、而我何辜。

尊者曰、何足疑乎。且善惡之報有三時焉。凡人但見仁夭、暴壽、逆吉、義凶、便謂亡因果虛罪福。殊不知、影響相隨毫釐靡忒、縱經百千萬劫亦不磨滅。

時闍夜多、聞是語已頓釋所疑。

或人問永平如何是現報、祇對他道、現報者乃蕎麥也。

或有問如何是生報、祇對他道、生報者乃大麥也。

或有人問如何是後報、祇對他道、後報者乃好堅樹也。

518

上堂

以拂子打一圓相了、拈起拂子云、我若拈起、汝等喚作諸佛出世。我若放下、汝等喚作祖師西來。我若打圓相、汝等喚作諳佛之所護念、祖師之所護念。忽然不拈起不放下不打圓相、汝等向什麼處卜度。直饒卜度得、可笑無生知見、可笑鬼窟活計。雖然如是、永平門下更有長處。大眾要見長處麼。

又拈起拂子、良久云、大眾會麼。若會也、諸佛法身入我性。若未會也、我性同共如來合。大眾、作麼生是諸佛法身入我性、我性同共如來合道理。

良久云、早朝喫粥齊時飯。初夜坐禪中夜眠。

519

上堂

順聖端居似慕賢。愛乾未濕水心蓮。須知這裏端嚴事。面授二千二百年。

520

上堂

拈處即宗、放下傳風。未拈未放、七通八通。溪則夜流晝水、濯月濯日。山則南雲北雨、染青染紅。趙州柏豈境、多福竹成叢。三世如無向背、大千似掛虛空。刹那非我非汝、修証自西自東。

521

中秋上堂

月非圓欠、月豈虧盈。任他正好供養、休管正好修行。玄沙之第二月將落、雲巖之第幾月莫盛。雖然如是、佛祖兒孫更有向上事。

世尊在世、羅睺羅阿修羅王、欲噉月。月天子恐怖、疾到佛前、說偈白佛言、大智精進佛世尊、今我歸命稽首禮。是羅睺羅惱亂我。願佛憐愍見救護。

佛與羅睺羅阿修羅王而說偈言、月能煦闇而清涼。是虛空中大燈明。其色白淨有千光。汝莫吞月、疾放去。是時羅睺羅阿修羅王、怖據流汗即疾放月。

婆梨阿修羅王、見羅睺羅阿修羅王惶怖放月、說偈問曰、汝羅睺羅、何以故、惶怖戰慄疾放月、汝身流汗猶如病。心怖不安乃如是。

羅睺羅阿修羅王、爾時說偈答曰、世尊以偈而勅我。我不放月頭七分。設得生活不安穩。以故我今放此月。

婆梨阿修羅王、說此偈言、諸佛甚難值。久遠乃出世。說此清淨偈、羅睺即放月。

然則今月天子、全保彼天五百歲之壽命、唯酬世尊之所救護也。謂、彼天壽命者、以人間五十年為彼天之一晝夜。乘此三十日為月、十二月為年、乃五百歲也。雲水須知、今日秋月光明清涼、照世間閻、宛是世尊眼睛之因緣也。

永平正當中秋月圓之節、欲重舉世尊所說偈中之明之一字、而增月宮殿之光明、照大千界之迷闇而已。蓋是佛燈也、蓋是佛勅也。

而說偈言、

依佛威神宮殿明。
千光赫赫一時生。
人間縱愛中秋月、
天上莫涯半段晴。

522 上堂

云。記得。先師天童住天童時、上堂示衆曰、衲僧打坐正恁麼時、乃能供養盡十方世界諸佛諸祖。悉以香華•燈明•珍寶•妙衣•種種之具恭敬供養無間斷也。汝等知麼、見麼。若也知得、莫道空過、若也未知、莫得當面諱却。

師云、永平忝為天童法子、不同天童舉步。雖然一等天童打坐來也。如何不通天童堂奧之消息。且道、作麼生是恁麼道理。

良久云、衲僧打坐時節、莫道磨磚打車、供養十方佛祖、妙衣•珍寶•香華。正當恁麼時、更有為雲為水示誨處麼。

顧視大眾云、凡類何能聞見及、自家一喫趙州茶。

523 上堂

今朝九月初一。打板大家坐禪。切忌低頭瞌睡。思齊在見來賢。休陳附木依草。莫外求窮臘蓮。脫落身心兀兀。蒲團雖舊新穿。正當恁麼時、又如何。

良久云、修証非無誰染污、豈同十聖及三賢。

524

源亞相忌上堂

云。報父母恩、乃世尊之勝躡也。知恩報恩底句、作麼生道。棄恩早入無為鄉。霜露盡消慧日光。九族生天猶可慶、二親報地豈荒唐。

舉。藥山坐次、有僧問、兀兀地思量什麼。

山云、思量箇不思量底。

僧云、不思量底如何思量。

山云、非思量。

今日殊以這箇功德莊嚴報地。

良久云、思量兀兀李歸張。欲畢談玄又道黃。誰識蒲團•禪板上。鑊湯炉炭自清涼。

525

上堂

古先老漢云、學道不用見聞覺知、若行見聞覺知、即是見聞覺知。非學道也。

所以永平道、佛道莫須神待悟。少曾文字語言傳。轟轟霹靂縱參究、何脫根塵•名相邊。壁觀•磨磚面面。功夫精進連連。身心纔肯虛劫、方見鉢盂口圓。這箇是長連床上學得底、佛祖向上道又且如何。

良久云、馬祖•馬鳴頭尾正。黃梅•黃檗弄風前。一行三昧打巾斗、七佛袈裟覆在肩。

526

上堂

須知作佛非新古、修証豈唯邊際中。莫道本來無一物。因圓果滿有時通。且道大眾、為甚如此。

良久云、華開必結真實、青葉逢秋即紅。

527

上堂

滴水滴冰豈變豈凝。修因感果橫合豎升。若論授記也、米價定廬陵。若論作佛也、致雨酬雲騰。向來即道順道底句、更有慈悲落草之談、又作麼生。

良久云、初燈頓破始終暗。設見屢加明更增、莫是再拈非別異。百千萬盞室中燈。

528

開爐上堂

設量世界邊際、古鏡唯非畫圖。百丈未知一丈。雪峰始造依模。正當恁麼時、衲僧分上又作麼生。

良久云、衲僧今日競開爐。不撥冷灰是丈夫。拋下談玄兼說妙、却來這裏煮廬都。

529

上堂

記得。南泉示衆云、王老師賣身去也。還有人買麼。

時有僧出云、某甲買。

泉云、不作貴、不作賤、作麼生酬價。僧無對。

趙州答云、來年為和尚作一領布衫。

大衆會得這一段因緣麼。永平為雲水欲流通、還委悉得麼。

良久云、

賣身未了酬輕價。

攬奪可憐行市人。

蒿草栴檀多少要。

一龍八馬各逢春。

530

上堂

舉。波斯匿王問賓頭廬尊者、承聞尊者親見佛來、是不。

尊者、以手策起眉毛示之。

先師天童頌曰、

策起眉毛答問端。
親曾見佛不相瞞。
而今應供四天下。
春在梅梢帶雪寒。

永平今日、拜續高韻為雲水衆。大衆要聽麼。

良久云、

親曾見佛語言端。
策起眉毛欲不瞞。
功德田春華未落。
瓊林老鶴翼猶寒。

531
上堂

青原白家三盞酒。
石頭紅爐一點雪。
拄杖開華有功、
蒲團可笑無欠。

正當恁麼時、永平門下作麼生道。

良久云、

喚其業作三界、
得話頭為一心、
龍樹接人鉢水、
提婆進道拈針。

永平禪寺語錄七終

Endnotes

1. Dan Leighton & Shohaku Okumura, *Dogen's Extensive Record*.
2. The two lines of text in a blue font are supplementary notes added by Gien, Dogen's attendant who compiled and edited Volume 7.